

01. 三層樓仔

以早，有一位叫做阿三的有錢人，會使講是好額甲有賸。

有一工，阿三去拜訪朋友恁兜，看著朋友彼間起甲誠氣派的三層樓仔，非常欣羨，阿三心內想：「我的財產嘛無輸伊，我嘛欲起一棟閣較有派頭的樓仔厝。」

第二工透早，阿三就派人請做木的師傅來，準備欲起樓仔厝，這個做木的師傅就是替他（in⁷）朋友起三層樓仔的人。阿三足歡喜，就將心目中樓仔厝的形體講予做木的師傅聽，做木聽了，伊講：「無問題，你做你放心。保證予恁一棟會比並得的三層樓仔。」

做木的師傅真正無講白賊，隔轉工隨恁幾若个工人開始鏗鏗鏘鏘。阿三看著，心內歡喜又閣期待。起樓仔厝，第一步就是要先拍地基，這個誠有經驗的師傅，做法當然嘛全款。頭起先，伊先挖塗、整地、拍地基……足拍拚咧做工課。

但是佇咧邊仔監工的阿三看著，心內煞愈來愈著急，一直咧蹵蹵唸：「這款方式，啥物時陣我的『三層樓仔』才起會好咧？」

所以阿三共木工師傅講：「毋著，毋著，我欲愛三層樓仔，你咧做啥物？」木工師傅應：「是啊！我就是照你的要求，當咧起三層的樓仔厝啊！」

阿三說：「猶毋過，我無需要下底的兩層樓，你只要

起第三層樓就會使矣！」做木的師傅共應講：「這是無可能的代誌。我從來毋捌起過一棟樓仔厝，是無需要拍地基、無按第一層樓開始起的。」

阿三猶原真堅持，伊講：「一般人攏真戇，起厝總是愛對第一層開始起，我才無欲遮爾仔戇，無彩起第一層、第二層的錢。我無需要下底彼兩層樓，你只要起第三層樓仔就會使！」

做木的師傅誠可憐，愣佇咧遐，毋知影應該如何是好。

世間上真濟人無重視基礎，總是食無三把薤菜，就想欲上西天。尤其是現此時追求速度的時代，萬項代誌攏愛欲緊看著結果。論真講，咱應該愛知影，緊紡無好紗。欲成就啥物代誌，就愛一步一跬印，慢慢仔粒積。「未曾學行就先欲學飛，未曾掖種就想欲挽瓜」，基礎無在穩，絕對是無法度久長的。